

Lains d'Ardez fan ventiraivel

Tino Andri dad Ardez producescha dildos «rumantschs» – en idioms e dialects rumantschs

SUSI ROTHMUND/FMR

■ **«Engadiner Stosshölzer» sa numnan ils products per tudestg. Ed els tradeschan gia en moda detg evidenta lur funcziun. Il scrinari Tino Andri d'Ardez producescha dildos or da lain – ed el numna ils differents models tenor idioms e dialects rumantschs: «Vallader», «Sursilvan» u perfin «Tuatschin». Co èsi insumma vegni a quell'idea? – La FMR ha dumandà suenter. «N'emporta betg tge – la moda e maniera fa in'enorma differenza. 100 % Swiss Made», pon visitadras e visitadras da la homepage da l'interpresa «MANU_fuck_TURA» leger sco emprim. In zichel plinengiu paradeschan ils favurits actuals: Tut sidretg il model «Tuatschin», il «Vallader» ed il «Sursilvan». Ins pudess dir «in Reih und Glied». I sa tracta numadamain dals dildos da lain dir dal scrinari Tino Andri d'Ardez. Igl è il medem Tino Andri, il qual la FMR ha er purtrettà dacurt sco ambassadur dal rumantsch en in spot da reclama ch'è da vesair actualmain en televisiun.**

Scrinari cun bleras ideas

Uschenumnads «lains per stumplar» èn mo ina da las ideas che Tino Andri ha gia ditg en ses chau. Durant l'emprim lockdown èn quels giugarets da sex vegnids actuals. «Ina bun'amia è sa separada da ses partenari ed era trista – ses cor era rut. Perquai hai jau fatg l'emprim dildo e regalà quel ad ella per la consolar in zichel. Nus ans conuschain fitg bain, uschia che quai n'è betg stà in affrunt ordinari, ma bain plitost divertent», sa regorda il scrinari cun atgna fatschenta ad Ardez. In dildo ha clamà l'auter e sin basa dad inputs ed ideas da clientella èn quels vegnids adattads e perfecziunads.

Tino Andri ha regalà ses «lains per stumplar» ad amias ed amis, e cun il temp er a glieud ch'avess pudì avair retegni-

tshas. «Quai ha funcziunà bain, nagin n'era permalà. Mes lains èn in bun tema per discussiuns e schlucan bleras situaziuns», di il bab da dus uffants.

La fin finala ha el vuli professionalisar la chaussa ed ha perquai fundà la «MANU_fuck_TURA». Quai ensem cun ses ami Bastian Sarott ch'è responsabel per il marketing, e cun Susana Gonzales Müller, ina designra cun bleras bunas ideas. Per exempel ha ella gi l'idea da numnar ils dildos tenor idioms u dialects rumantschs. «Anc legher che gist ella, sco suletta betg Rumantscha en noss team, ha gi quest'idea», manegia Tino Andri.

Giugarets da lain dir

Cun la vendita ha la nov'interpresa cumenzà mez december ed ils products or da lain nuscher u mailer sa vendan bain, il model il pli tschertgà saja actualmain il «Tuatschin». «Nus regalain plaschair», è il mainafatschenta persvas e tradescha ch'el haja regalà a sia dunna il lain «Tuatschin». El haja er gia massa ideas per novs models. Plinavant vules el er realisar cun temp e peda intgins models cun vibratur.

Mintga model è in unikat – cun divers lains e differenta structura. Ils dildos vegnan producids a maun ed elavurads dal scrinari persunalmain al turn. A la fin vegnan els anc tractads cun in ieli spezial che nutrescha il lain. Damai pon ils lains vegnir lavads cun aua e savun, uschia che tenor il producent saja garantida l'igièna.

Causa tut questa lavur a maun han ils dildos er lur pretsch – ils «Engadiner Stosshölzer» èn da cumprar per in pretsch da 199 francs ensi. Il model «Tuatschin» ha per exempel dapli curvas ch'il «Sursilvan», ch'è per la paja in zichel pli lung. Il «Vallader» è tenor Tino Andri in model spezial per persunas cun experièntsch da chattar e stimular il punct G. Il sortiment da dildos da Tino Andri è damai ritg – e variescha tenor gust e tenor idiom rumantsch.



«Ûn dun da la natüra» – quai empermetta la MANU_fuck_TURA gia sin las stgatlas cun ils dildos che han nums rumantschs. Quist è il «Tuatschin».

FOTOS MANUFUCKTURA



Il scrinari Tino Andri d'Ardez vi da turnar giugarets da sex per creschids.